



Sarajevo, 10.3.2014.godine

## SAOPŠTENJE ZA JAVNOST

**Prezentacija rezultata prve faze projekta EXtension of POtentiality of Adriatic Unesco Sites (EX.PO AUS) - Povećanje korištenja mogućnosti jadranskih UNESCO lokaliteta i radionice pod nazivom „Izazovi u implementaciji planova upravljanja za područja svjetske baštine“ organizovane u sklopu navedenog projekta.**

Komisija za očuvanje nacionalnih spomenika Bosne i Hercegovine je u ponedjeljak, 10. marta 2014. godine na lokalitetu mlinice u Zahumlju, Mostar upriličila ceremoniju na kojoj su predstavljeni rezultati prve faze projekta EXtension of POtentiality of Adriatic Unesco Sites (EX.PO AUS) - Povećanje korištenja mogućnosti jadranskih UNESCO lokaliteta.

Na oba navedena događaja prisutnim zvanicama su se obratile glavna savjetnica Grada Mostara gospođa Radmila Komadina i Izvršni dužnosnik Komisije za očuvanje nacionalnih spomenika Bosne i Hercegovine gospođa Mirela Mulalić Handan.

Projekt EX.PO AUS je prekogranični projekt sufinansiran sredstvima Evropske unije u okviru IPA Programa jadranske prekogranične saradnje 2007-2013. U projekt je uključeno dvanaest partnera iz sedam država na Jadranu a u Bosni i Hercegovini ga implementira Komisija za očuvanje nacionalnih spomenika.

Opšti cilj Projekta EX.PO AUS jeste uspostavljanje mreže saradnje lokaliteta koji su na UNESCO-ovoj listi na prostoru Jadrana (uključujući i one koji su na Privremenoj listi svjetske baštine), koja će prekogranično razvijati i razmjenjivati visokokvalitetne tehničke i upravljačke vještine uključivanjem javnog i privatnog sektora.

Projekat EX.PO AUS u Bosni i Hercegovini usmjeren je prvenstveno na podizanje svijesti o značaju i vrijednostima vernakularne arhitekture, sa posebnim naglaskom na objekte mlinica. Vrijednost do sada realiziranih aktivnosti u sklopu projekta iznosi oko 100.000,00 KM. Realizirane aktivnosti su bile usmjerene na konzervatorske radove tekućeg održavanja dvije mlinice u Mostaru, detaljan arhitektonski snimak postojećeg stanja mlinica i objekata na vodi u Mostaru, Blagaju i Stocu te detaljan geodetski snimak korita rijeka Radobolje (donji tok), Bune i Bregave.

U okviru ceremonije na kojoj su predstavljeni rezultati prve faze projekta prezentirana je izložba panoa mlinica sa područja grada Mostara sa informacijama o historijatu i rasprostranjenosti, arhitektonskim karakteristikama i rizicima kojima su trenutno izloženi objekti mlinica na širem području grada Mostara te u sklopu projekta EX.PO AUS izvedenim konzervatorskim radovima tekućeg održavanja na mlinici u Cernici i mlinici u Zahumlju.

U okviru implementacije dijela projekta pod nazivom Prekogračnično održivo upravljanje UNESCO-vih lokaliteta na Jadranu, Komisija za očuvanje nacionalnih spomenika je u saradnji sa nositeljem navedenog dijela projekta, Centrom za konzervaciju i arheologiju Crne Gore, istog dana organizirala radionicu pod nazivom „Izazovi u implementaciji planova upravljanja za područja svjetske baštine”.

Cilj ovog dijela projekta jeste da se kroz organizaciju šest lokalnih radionica (u Italiji, Hrvatskoj, Sloveniji, Bosni i Hercegovini, Albaniji i Crnoj Gori) kao i jednog prekograničnog trening seminara definiše Inter-jadranski zajednički pristup održivoj valorizaciji UNESCO lokaliteta. Radionica u Mostaru predstavlja četvrtu organiziranu lokalnu radionicu.

U okviru radionice održana su dva stručna predavanja o izazovima u implementaciji planova upravljanja za lokalitete svjetskog naslijeđa od strane stručnjaka sa dugogodišnjim profesionalnim iskustvom u oblasti očuvanja kulturnog naslijeđa: Mirela Mulalić Handan, Izvršni dužnosnik Komisije za očuvanje nacionalnih spomenika i Katri Lisitzin, arhitektica i konsultantkinja za kulturno naslijeđe.

Nakon uvodnih predavanja održana je panel diskusija na kojoj su od strane agencija i nadležnih institucija za implementaciju planova upravljanja u Bosni i Hercegovini prezentirani konkretni primjeri i bosanskohercegovačka iskustva u implementaciji planova upravljanja.

(k r a j)



Ceremonija na kojoj su predstavljeni rezultati prve faze projekta EXTension of POtentiality of Adriatic Unesco Sites (EX.PO AUS) - Povećanje korištenja mogućnosti jadranskih UNESCO lokaliteta



Radionica pod nazivom „Izazovi u implementaciji planova upravljanja za područja svjetske baštine“ organizovana u sklopu projekta EXtension of POtentiality of Adriatic Unesco Sites (EX.PO AUS) - Povećanje korištenja mogućnosti jadranskih UNESCO lokaliteta